

Urteei bizia eranstekoz asmoz hasiko da 'La buena vida' saioa

Gaur hasita, 65 programa emango dituzte ETB2an, Jose Luis Neyroren gidaritzapean

I. Olabarri / Bilbo

Jose Luis Neyro sendagileak gidaturik, *La buena vida* saioa eskaintzen hasiko dira ETB2an gaur eguerditik aurrera. Gizartean hedatuta dauden gaitzez kontzientzia-zea eta gaitz horiei ahal den neurrian aurrea hartu eta tratatzea dute helburu. Osakidetza izango dute laguntzaile saioa egiteko orduan.

«KONTSULTAN lanean ari den unean grabatzen duten sendagile bat izan nahi nuke, ez programa zuzentzen duen norbait». Hitzokin azaldu zuen Juan Luis Neyro sendagileak *La buena vida* saioan beteko duen lana. «Programa horretan egingo dudana lanak zerikusia du sendagile orok dibulgatzeko duen konpromisoarekin. Azken helburua nor bere buruaren osasunaren arduradun izatea da».

La buena vida saioak ordu erdi iraungo du. Eguerdiko 13:30etan hasiko da, albistegien aurretik. Horrek garbi adierazten du, Pello Sarasola ETBko programazio arduradunaren ustez, programa horri ematen dioten garrantzia: «Albistegien aurretik eta Euskal Herrian telebista asko ikusten den denbora tarte batean sartu dugu programa. *La botica de la abuela* ordu erdiz aurreratuko dugu, eta horren ostean hasiko da programa berria».



Pello Sarasola, Gerardo Fernandez Llana, Jose Luis Neyro eta Gabriel Inclan, atzoko aurkezpenean.

Orotara 65 programa emango ditu ETBk, bigarren katetik. Orain arte 10 daude grabatuta, Gerardo Fernandez Llana Proyeccion y Servicios ekoiztetxeko arduradunak azaldutakoaren arabera. «Guztira 65 gaitz edo gaixotasun jorratuko ditugu, kanpoko 200 kontsulta izango dira, eta 300 gaixo eta beste hainbeste espezialista igaroko dira programatik».

Hiru zatitan banatu dute programa. Lehenengoan, luze eta zabal jorratuko dute gaixotasun bat, espezialista batekin eta gaixo batekin; bigarren atalean, ikusleen zalantzak argituko dituzte; eta hirugarrenean, osasunarekin zerikusia

duten hainbat gairi buruzko iritzia eta aholkuak emango dituzte.

«Biziari urteak, urteei bizia»

Saioak Osakidetzaaren babesa izango du. Alde hori nabarmendu zuten bai ETBko arduradunek, bai Jose Luis Neyro sendagileak berak ere. Guztira, 30 milioi pezeta kostatuko zaio Osakidetza programa aurrera ateratzea.

Gabriel Inclan Osasun sailburua ere izan zen programaren aurkezpenean izan zen. Inclanek esandakoaren arabera, gizartean bizi-kalitateari buruz hedatutako interesa dago programaren oinarrian. «Gure

asmoa da Eusko Jaurlaritzaren asmoekin bat egitea eta biziari urteak ematea eta bizia ematea urteei, ezagutza teknologiko eta zientifikoek ahalbidetzen duten neurrian osasuna hobetzea».

Inclanen hitzetan, ikusleei kasu bakoitzean nora jo behar duten irakatsi nahi diete saio horren bitartez. «Kasu batzuetan, nahikoa izango dute lehenengo asistentzia, beste batzuetan espezialistaren beharra izango dute, eta beste batzuetan larrialdietara jo beharko dute». Ikusleek hori ikasten duten heinean osasun baliabideak hobeto aprobetxatuko dituztela nabarmendu zuten, eta horrek ekarriko duen onura azpimarratu.

aditza badut ♦
Xabier Lasa

Informatuak

Efe • Gerra Zibila bete-betean zela, frankismoak Agencia Efe eta RN eratu zituen, asmo propagandistikoek. Egun ere, nazionalen seme politiko Mayor Orejaren eta haren bidelagunen menpe dira biak. 1976a bitartean, hemengo irratia RNren parteekin konektatzera derrigortuak zeuden. Egun ez, baina ohitura totalitario horrek borondatezko jarraipena izan du Herri Irratiarekin. Orainsu arte hark bat egin izan du Agencia Efeko orduz orduko albistegiekin. Ekonomikoki bidera-egina egingo zitzaion etxeko buletinak osatzea, baina iseka egiten zion, egiazki, irratia ibilbide konprometituari bezala bere entzule atxikiari ere. Ez dator gaizki gogoratzea datu ilustragarri hau: Franco eta Falangeren F inizialean oinarri duen Agencia Efe-ko zuzendaritzan Anson eta Carlos Mendo bezalako erreakzionarioak izan direla azken urteotan.

Euskadi Gaur • Orduero buletina ematen duen irrati-entzuleak ez du zertan egon inor baino itsatsiagoa aktualitateari. Zenbat eta albistegi gehiago aditu orduan eta hobeto informaturik egoten dela dioten uste zabaldua falazia hutsa da. Ez da matematikoa, zeren gainerakoan *Radio 5 Todo Noticias*-eko entzulea litza-teke informatuena, jantzi-ena. Aitzitik, antsietatea eta *berrijalekeria* konpultsiboa sor dezake horrek; gizakirik desinformatuena, alegia. Irratigintzan bada printzipio oker bat zeinak dioten irrati bat adinez nagusia dela orduero albistegi propioa egiteko gauza den heinean. Kalitatea ahazten da, zorigaitzez. Haatik, pozgarria da Herri Irratiak printzipioari muzin egin izana orain. Ordueroko albistegien ideia obsesiboa ahaztu, eta egunean bi *Euskadin Gaur* ematera jarri da, eguerdiko Karmele Aranbururen eskutik eta ilunabarrekoa Arantxa Kaltzada eta Xabier Aranbururen eskutik. Hiru kazetariok kalitatearen eta konfiantza-aren zigu-lua daramate.

laburrean

Espainiako Canal Plusek ia 1.800.000 abonatu ditu

Espainiako Canal Plusen egoera ezin hobea dela esan du Jose Manuel Lorenzo telebista kateko zuzendariak. Izan ere, «ikaragarri» igo da abonatu kopurua. «Urte osorako aurreikusitako kopurua lau hilabetetan lortu da». Ia milioi bi abonatu ditu dagoeneko: «Gutxi falta da 1.800.000 etxetara iristeko; eta horrek esan nahi du sei bat

milioi lagunek ikusten dutela Canal Plusen programazioa». Jose Manuel Lorenzok azaldu zuenez, «abonatu guztietatik % 38k Canal Satelite Digitalaren bidez ikusten dute».

Gerra biologikoaren hipotesiaz erreportaia 'Documentos TV'-n

Código mortal izeneko erreportaia eskainiko dute gaur *Documentos TV* saioan, La2 katean. Ingeniaritza genetikoaren azken aurrerapenen gaineko

lana da. TVF Internacionalek ekoitzi du eta ia ordubete irauten du.

'La cocina de Pedro Subijana' aurreratu egin dute

Gaurtik aurrera 11:55ean emango da *La cocina de Pedro Subijana* sukaldaritza programa. Izan ere, *La buena vida* osasun saio berria hasiko da gaur, eta, hori dela eta, ordu erdi lehenago emango dute Pedro Subijana sukaldariarena.